

Železo kować, dołhož so žehli

Zastupnistwo Serbski sejm namołwi Zwjazkowu republiku Němsku, „dorěčenje wo domoródných a w kmjenach žiwych ludow w njewotwisnych krajach' Mjezynarodneje organizacije za džěło (ILO 169), kotrež je 5. septembra 1991 plaćiwosće nabyło, ratifikować kaž tež serbski lud jako indigeny narod w zmysle dorěčenja připóznac“.

Hodźij (SN/at). Wuběrk „wustawa/prawo“ noweho zastupnistwa je nadawk dóstał, zdobyć partnerow za přesadjenje wobzamknjenja; w jednanjach měli na to skutkować, je zwoprawdźić. To je wobsah wobzamknjenja z 5. posedženja cyłka sobotu w Hodźijskim kantorace.

We wobłuku naprašowanja hosći je Hodźijski wjesnjanošta Gerald Meyer (njestronjan) swoju komunu předstajil. Informowaše zdomom wo serbskim komunalnym programje Sakskeje, po kotrymž ma kóžda komuna w serbskim sydelskim rumje lětsa a klětu po 5000 eurach pawšalnje za skrućenje serbsčiny w zjawnosći k dispoziciji. „Wot tych pjenjow móžemy na přikład tež wohnjowobornu gratownju w Spytectach němsce a serbsce popisać“, mjenowaše wjesnjanošta praktisku ideju. W zwisku z rěču wón zdžěli, zo su prócowanja wo zawjedženje wučby serbsčiny po modelu 2plus naje- bać podpěru gmejny, staršich a Domo- winy zwrěšćili, dokelž „šula to no chce“.

Wuradźowanje je we wšelakim nastupanju wobtřěšćowało, zo zaběraja so člonoj Serbskeho sejma dale z tym, swójske džěłowe struktury wutworić. Za wuběrk IT je dr. Hagen Domaška namjet za IT-infrastrukturu Serbskeho sejma předstajil. Wobswětlił bě koncipowany interny prud informacijow mjez člonami zastupnistwa, ale tež wotmyslenu prezentaciju w interneće. W tym zwisku schwalichu namjety, džěłakmanosće Serbskeho sejma dale polěpsić. Mjez druhim we wobzamknjenju rěka, zo skutkuje towarstwo Smy jako juristiska wosoba za zřěčenja nastupajo IT-infrastrukturu. „Jeli je trjeba, měli so wustawki Smy z.t. wotpowědnje změnić.“ Prawniski wuběrk njech nětko namjety přeprowuje, zo móhli změnu na to zeskutkownić.

Serbski sejm schadźuje so na zakładze loni w decembrje schwaleneho plana. Tam zapisane su terminy, městnosće a zamołwitosće. Mjeztym předležitej poskitkaj Choćebuskeho kaž tež Kamjenskeho wyšeho měšćanosty, zo móhł sejm w tamnišej radnicy wuradźować. Kak z tym nětko wobchadźeć? W diskusiji wuprajichu so někotři za krute dodžerženje plana. Druzy mjenjachu, zo měli přeprošeni přiwzać a „železo kować, dołhož so žehli“. Dojednachu so na to, na zakładze předležaceho plana terminaj z wyšimaj měšćanostomaj za schadźowani w Choćebuzu a Kamjencu wothłosować.